


1990



Herwespriuch

K e r w e s p r u c h . 1 9 9 0

Ehr lieve Leit, es ess schunn woahr,
es ess wirrer Kerb wie alle Joahr,
aach dies Joahr laafe mer uff die Gass enaus,
un loasse mit veel Fraad die Wutz eraus.
Mer dun wirrer feiern, seun froh und dun doanze,
saufe veel Bier un fresse voll unser Roanze.
Vier Doach loang werd rischdisch emaal de Alldoach vergesse,
un emaal kräftisch und lautstark ess Maul uffgeresse.
Aach dies Joahr gibt die Kerb wirrer dess Fest der Feste,
weil do gibt jeder Worfeller nur es allerbeste.
Ich glaab a unser Wertsleit loasse sich net lumbe,
drum ruf ich jetzt : "Robert, en Humbe ".

Aach dies Joahr hoann mer uns gut vorbereitet',
un dess alles fer eisch ehr Leit.
Drum feiert alle rischdisch mit,
do werd unser Kerb en riese Hit.
Un hoffe mer de Soal iss proppe voll,
ja do dreiwe mers noch emol so doll.
Drum seegt de Baber zu de Momme,
so jung kumme mer net me zusoamme.
Deshalb speelt die Musigg un all soin mer froh,
denn " Die Worfeller Kerb is wirrer do".

Die Worfeller Kerb, die Worfeller Kerb,.....

Ruhe ehr Leit, jetzt kennt er glei lache,
iwwer die veele dolle Sache,
die die Leit im Ort so mache.
Wie ehr wisst ehr lieve Leit im Ort,
geht en Kerweborsch ohne es Bändsche gar net fort.
Es Bändsche ess e wischdisch Utensil,
dess gibt dem Kerweborsch erst de rischdische Stil.
Kerwemondoags 89 um 9.00 Uhr ging mer uff die Gass,
um Eier zu soammle, wie alle Joahr en heide Spaß.
Rote und Grüne zogen gemeinsam hinaus,
um viel zu sammle fer den festliche Schmaus.

Fertisch gedahlt, ess hat jeder soi Gescherr,
un am End war mer sich net emol err,
So zooge mer Rote mit unserer Scherb,
zum Schlabbe in feierten weider die Kerb.
Ess Hemd in die Hose, die Bändscher noch emol groad geriggt,
so hoann mer doann die goanz Wertschaft entzickt.
Beim Eumarsch speelt die Musigg ehr Ständsche,
do kreischt de Heiko: "Ei Detlef, woas hoaste doann do fer e Bändsche?"
De Detlef guckt uff soi Bändsche und werd rot,
"Ei woas hoab isch doann fer e Bändsche oa, isch Idiot!"
"Groad zwaa Joahr bin isch debei es ess woahr,
un isch nemm's 88er Bändsche, ei bin isch doann noch kloar?"
Die goanz Wertschaft duut iwwern lach,
awwer de Detlef duut sich nigs draus mache.
Drum Detlef mach disch nett loang erum,
un zieh der dies Joahr immer ess rischdische Bändsche um.
Doch Detlef so woas koann jedem bassiern, nett nur Dir,
drum speelt die Musigg: "So sind wir."

So sind wir, wir pfeifen auf die Sorgen, so.....

Die Kerb war kaum 4 Woche erum,
do fährt oaner ins Feld un setzt Grenzposte um.
Soi Werkzeisch un de Ploan dut er sich hielehje,
un wo soi Poste hiekumme, muß er sich erstemol iwwerlehje.
Do denkt er sich, so muß es geh',
die Poste kumme genaa dort he.
Mit dem Spate in de Hoand,
werd weggeroahmt der goanze Sand.
Er awweit sich loangsoam mit dem Werkzeisch oi,
weil der Poste muß uff jeden Fall in des Loch enoi.
Liewer e bisje weider iwwer die Grenz enaus,
denn jeder Meter macht woas aus.
Wie er die Löcher hot all fertisch gescheppt,
do hot er soi Bengel enoi gesteckt.
Wie er de erste hot noigehaache,
denkt er: "Des gibt es super Grundstick, keine Frage."
Beim zweite war de Sand noch schee waasch,
doch beim dritte denkt de Schmidde Otto: "Leck misch oam Asch,
der Poste hängt noch on irgend so ner Trenasch."

Do guckt er in soi Loch enoi,
jetzt kimmt do schun Plastik, dess derf doch net soi.
Er hacht noch emol rischdisch druff, un de Hoammer fliegt fort,
vunn dem Schloag aus gabs koan Strom mer im goanze Ort.
Es hatt' nur noch gefunkt, geblitzt un gezischt,
weil er hat die Worfeller Hauptstromleitung erwischt.
Doch liewer Otto, schmeiß nett glei es Duch,
so Sache brauche mer Kerweborsch fer unsern Spruch.
Drum Otto bass mit dem Hammer es nextemol besser uff,
un haach a net sofort uff jeden Poste druff.
Deshalb speelt die Musigg fer Disch allein
Dann hau isch mit dem Hämmerchen mein Sparschwein.

Dann hau ich mit dem Hämmerchen mein Sparschwein,.....

Wie jo vieler Orts bekoannt,
speelt unsern Speelmoanszug im goanze Loand.
Gepeffe und gepaukt werds goanze Joahr,
awwer oan Fasnoacht in Meenz wie net mer kloar.
Während in Worfelle mer schalt de Fernseh' oi,
geht mer in Meenz noch emol in die Kneip' enoi.
Doch donn um korz noch zwölf geht's los,
un die erste Nummern soin schunn im Bild goanz groß.
Erst kumme große Woage, doann Kutsche mit Räder und Reife,
uff oamol heert mer im Hinnergrund leise woas peife,
jetzt heert mer im Fernseh' de Sprecher soage,
ess kimmt die Mainzer Freischützengarde un ehr Woage.
Die Traudl stellt in de Kisch weg ehrn Dopp,
während die Ingrid om Video sucht de Uffnoahmeknopp.
Do laafe se ins Bild als erstes de Lyrasatz,
goanz rechts auße leeft de Traudl ehrn Schatz.
Bei de Ingrid nimmt de Video groad uff,
un bei de Traudl im Fernseh' kimmt de Bernd groad druff.
Wie se ehn sieht bleibt rer die Luft fast weg,
doch doann, do grigt se en riese Schreck.
Dess dut en Schloag ess Bild ess fort und die Traudl was net wo,
un de Tobias freegt: "Wieso iss en de Babba net me do?"

Die Traudl schalt' oan alle Kneppscheren um,
doch es dut sich nix, der Fernseh bleibt stumm.
De Fernseh' war kabutt; die Traudl iss fast ausgerasst;
de Bernd war dro schuld; der hot net uff de Bildschirm gebasst.
Awwer Traudl mer kenn disch beruhische, woann dess willst
noch emol seje,
do muß de nur es Lutze ehr Ingrid frehje.
Un fer unser Traudl speelt die Musigg rasch,
d echte Meenzer Narhallamarsch.

Ritz om Boa.....

Aach in Bochum/Dortmund do war woas los,
die Stimmung uff em Tornfest war riesengroß.
Speelmansleit und Gymnastikdame,
Tornerrinne un Zuschauer kame,
wolle seje die Show, die im Revier wurd uffgezoue,
awwer aach wies zwaa Worfeller Spielleit ging es net geloue.
Es Tornfest awwer war schnell fertisch,
jetzt gings nach Unna, zu de Spielleit vum Erich.
Bei de Rezeption will de Schorsch noch em Rechte seje,
"Iss alles klar?" , freegt er die Dam, die segt: "Vun weje".
"Ess fehlt de Zimmerschlissel 301-
dort meld sich schon seit Stunne koans."
Im Bus sitzt schunn alles, de Motor iss oh,
vun drauß winkt de Schorsch, woas werd er ner ho?
"Aacheblick," rift de Schorsch, " mer kenne net fort
zwaa vun unserne Borsch so in net oan Bord."
Es war de Scheenebeer Inge un de Martin Kaus,
die kame partout aus em Bett nett eraus.
Ich will eich hier vor de Leit net blamiern,
doch ich hoff ihr dut eich beim Spielmoanszug revangiern.
un es Speelt die Musigg für euch beide,
das Lied "Turner auf zum Streite".

Dies Joahr im März hat's zwar nett gebrannt,
awwer weje de veele Stürm in unserm Land,
is unser Feierwehr öfters oans Gerätehaus gerannt
Es kumme veei Leit, monche mit em Auto, die oannern gerennt,
un oaner gelaafe, en oannern verpennt.
Moanch oannern kumme zum Einsatzort naus,
do ess die Feierwehr schun es Stunn long draus.
Es war a oaner debei,
dess ess en Kerl, der ess in derei.
Er wollt' helpe schleppe, die Beem vun de Stroß,
hockt sich in soi Auto un fährt a glei los.
Uff de Merfeller Chaussee hält er doann ooh,
un er denkt sich: "Ei woas leid doann do!"
En riese Boam, do kimmt er net drum-erum,
er hockt sich ins Auto un dreht widder um.
Irgendwie muß ich's schaffe, dess muß oafach soi,
do biegt er oafach in de nächste Waldweg oi.
Mal schnell um 6 Ecke gefahr'n, do hätt er's geschafft,
do dreht er sich um un hot bald nix meh' gerafft.
En Boam fällt hinnerm um, do hat er noch emol Glick,
dess Dumm ess bloß ess geht net meh' zurick.
Er fährt noch e paar Meter do leid widder en Boam,
do winscht er sich, wär ich doch bloß schun dehoam.
Er steht mitte im Wald ehr Leit war dess foi,
Er denkt was soll's do fahr ich halt querfeldoi.
Doch dess hat sich unsern Harald Schecker foi gedenkt,
wie ufferer Rallypist hat er soi Auto do dorsch gelenkt.
Awwer doann reißts links und recht's noch e paar Beem eraus,
do steigt er aus soim Auto aus,
nimmt die Boa in die Hoand un keilt durch de Wald,
uff dem Weg bis zu de Feierwehr macht er koa oamol halt.
Wie er dort war hat er noch long gelitte,
un de neechste Doach hot die Feierwehr soi Auto aus em Wald geschnitte.
Un weil die Feierwehr hot long sich unterhalte,
speelt die Musigg: "Ein Männlein steht im Walde"!

"Ein Männlein steht im Walde....."

Wie mer waas is die Gummer a schönes grünes Objekt,
die im Salat oder aach ohne waas schmeckt.

Zwaa Worfeller Leit ginge owends geje 6,

zum Enehmers Schorsch, um zu robbe dess herrlich Gewächs,

Die Ingrid oam Door seegt: "Uff mich braucht Ehr nett zu waade,
geht hinner un robbt Eisch die Gummern im Gaade".

Hinnerkumme, do stehn se vorm Beet,

"Auf Oswald, robb sunst werd's zu spät"!

"Guck Ilse do leie se im Sand, "

"Ei Oswald, die soin jo nett greßer wie moi Hand".

"Ilse, hetz jetzt bloß nett erum,

guck emol do driwwe stehn veel greeßern rum.

"Ach Vadder, die hoann en Zaun do in de Mitte,
do kumme mer doch nett driwwer, Oswald bitte!"

So scheene Gummern finste nett meh im Ort,
auf Ilse, driwwer, Du willst doch noch fort.

Die Gummern, die soin doch de Hit,

do nemme mer glei e goanz Bit voll mit.

Die Bit iss voll, de Zaun is iwzerwunde,

so hoann mer uns beim Gummernrobbe schun long nett mehr geschunde.

Un wie sie mit de Bit donn oan de Räder warn,

soin's Kellers in ihr Hinnergass gefahrn.

Eigentlich iss die Geschichte on dere Stell jetzt aus,

un moanch oaner freegt sich waas kimmt do jetzt raus.

Die Woahrrred is, die zwaa hann de falsche Gaade verdappt,

weil de Eckert's Hermann is fast iwergeschnappt.

Doch es schenste iss, die hoann sich selber gefobbt,

weil die hoann statt's Gummern Zuchini gerobbt.

Un wo mer den herhoann den Hohn,

do freegt er oam beste mol eiern Schwiegersohn.

Un zu guder letzt' noch woas in eigener Sache,
obwohl ich sowas net gern mache.
awwer gesagt wern muß es doch,
weil bei de Kerweborsch klafft dies Joahr schunn e riese Loch.
Vielleicht hoann die meiste vun uns a ehr Alter erreicht,
wo mer als Kerweborsch die Rente eureicht.
Un ohne junge Leit dess werd ehr jo all versteh,
koann mer in koahner Kerwekampagne besteh'.
Dene junge Leit im Ort muß ich jetzt noch a verbasse,
"Ei wollt' ihr die Kerb in Worfelle unergeh' lasse"?
wo ess doann der Noachwugs der uns dut unerstütze,
sunst dunn mer es next Joahr mit zwaa Kerweborsch dositze.
Bei der Gaudi un der Feierei,
soin die meiste vun uns schun sechs Joahr debei.
Sechs Joahr war dess fer uns e riese Schau,
da warn die meiste vun uns noch mittwochs blau.
So ich her jetzt uff mit moim gelalle,
un ich hoff de Spruch hot eich e bisje gefalle.
Möcht' mich bei alle Leit noch bedoanke,
fer die viele Hilfe und die mords Gedoanke.
Soin mer next Joahr an Kerb a nett meh goanz so viel wie heit,
trotzdem soin mer a next Joahr beim Schlabbe ehr Leit.
Drum hoffe mer all, mer treffe eich a widder do oa,
woans hasst die Worfeller Kerb is widder do.

"Die Worfeller Kerb, die Worfeller Kerb,....."